

FILIPENSES

Pabloa Filipos huakka' jakya' huaknopoe'eritaj o'manigmadoya'uyate.

**Pabloa huabakudā' jakya'da
Filipos huaknopoe'eritaj
o'manigmadoya'uyate.**

1 ¹Pablo ijje^o Timoteoere Jesucristoen huakika'eri o'epo opud Filipos huaknopoe'eritaj on'nigmadoy'ne. Huaknopoe'eritaj huamatōe'eri huairi kenpa'ti huaknopoe'eritaj huatihuapokeri huairitaj on'nigmadoya'ne. Opu^odomey Jesucristotaj moknopoi^oka'po Diostaj 'uruda mo'nigpeika'ne. ²Apag Dios Jesucristo Huairierea di'da mo'epo daka' bo'tihuapokohue' mo'matinepahuionhue' mo'nopo'noeyanhue'.

**Pabloa Filipos huaknopoe'eritaj
o'mationa'pakuyate.**

^{3,4}Kirigayo' kenda opudtaj ijdiknopoe'po durugda Diostaj ijtiona'pakika'po do'hued Diostaj dakiti yonikay. Opu^od aya'tada dakiti yonikay. ⁵Jesucristoa dakhuea' e'ka'taj o'manopo'yarea' ijmanbatia'pakika'uy. Opu^odomey huakkuruda moknopoe'uy^o nogok nogokkon oy kenpa'ti do'taj on'tihuapokika'ne. Doere huadak hua'a mo'batia'pakika'. Konigepo Diostaj

dakiti yonikay. ⁶Kenpa'ti a'nenda Diosa opudtaj mo'matinepahui'uy^o huaboa'da mo'nopo'korea'uyne. Oy kenpa'ti nogok nogok Jesús e'tiakte Jesucristotaj mo'nigpeika'po Diosa mo'tihuapokika'nok nogiti nogiti 'urunopo'da mo'ika'apone. Jesús e'tiakte 'urunanada Diosen bo'kika'apone daka' ijnopoe'y. ⁷Cristotaj daka' yoknopoe'po di'da o'nene. Konigepo kenda daka' ijnopoe'y. Do huabakudā' jakya' pai'da e'nopo'ete do'taj Apag Diosa be'tihuapokika'ne. Kenpa'ti huadak hua'a ijmana'nok buttida hua'a o'e oknopoe'dik mo'ene. Diosa di'nanada me'epo be'tinepahui'po me'nopoteypaka'ne. Diosa opuderetaj doeretaj mo'tinepahui'po bo'tihuapokika'ne. ⁸Konig Jesucristo di'nanada mo'ene konigti do'huakon aya' opudomeytaj di'nanada o'nene. Kenda Diosapi' o'nopoe'. ⁹Opu^odtehuapa' Apag Diostaj ijtiona'paknok nogiti nogiti di' mo'maeapone opud kenpa'ti huayahuaaya di' mo'maeapone. 'Urunanada mo'nopoe'apone kenpa'ti Diosen huakika' daka' mo'nopoe'apone. ¹⁰Opu^odomey huadak e'ka' kan'nopei^oke'po Cristo e'tiakte Diostaj 'urunopo'da huadakyō'da kagkike'po huakka' ijpakpo ijtiona'pakikay. ¹¹Ken

Jesucristoa bo'tihuapokika'nok 'urua'da bo'kika'apo. 'Urua'nada bo'kika'nok Dios 'uruda o'e aya'ada on'nopoeapo kenpa'ti dakiti Dios aya'ada odika'apo. Kenda ijpakpo ijtiona'pakikay.

Do Cristoen ijnoenok aratbut oknopoiika'dik ya'neapet.

¹²Do'taj huabakuda' jakyo megkuda'uynok Jesucristo cruzte aya'tada mo'nigbuey'uyate huakka'ada on'peede. ¹³Ken Cristotaj yoknopoeapo huadak hua'a ijmanbatia'pakika'nok huabakuda' jakyo megkuda'uayne. Kenda aya' gobierno huairien jak sorotataa nogomeypi' on'nopoe. ¹⁴Ken do huabakuda' jakyo ijika'nok konigepo huakka'da huaknopoe'eria on'nopoeapo Jesucristoen huadak hua'a e'mana'ta' on'eretpakika'. Me'pukhue'ada e'mana'ta' on'pakika'. Kenpa'ti 'urua'da Jesús Huairitaj o'noknopoiika'. Kenda opudomeytakon e'nopoea'ta' ijpak, egomey.

¹⁵⁻¹⁷Nogomeya menhuadiaypo Cristoen huadak hua'a on'manbatia'pakika' kenpa'ti 'uruda huamanbatia'pakikeri o'ne e'huaa'ta' on'pakpo Cristoen huadak hua'a on'manbatia'pakika'. Hua'enda on'pakpo Cristoen huadak hua'a e'manbatia'pakada daknopo' ehueada on'manbatia'pakika'. Kenpa'ti do nogiti pai'da ka'nopo'epo on'pakpo Cristoen on'manbatia'pakika'. Nogomeynayo daknopo'da do'taj on'pakpo Diostakon on'pakpo Jesucristoen huadak hua'a on'manbatia'pakika'.

Jesucristoen huadak hua'a kenpa'da buttida hua'a o'e. Aya'ada oknopoe'dik o'ne. Kenda kenpa'da yamanmadikika', Dios Huairia Pablota' on'uyate on'nopoe. ¹⁸Kenda 'urunopo' ehueadapi' Cristoen huadak hua'a on'manbatia'pakika'. Daknopoada Cristoen huadak hua'a

on'manbatia'pakika'. Konigepo ijdurugpaki.

Nogiti nogiti ijdurugpakapoy. ¹⁹Do'tehuapa' opuda on'tiona'pakika'nok. Kenpa'ti Jesucristoen Nokirega be'tihuapokika'nok do pai'da ijnopo'epo kenda do'tehuapa' huadakda o'epo ijnopoey. ²⁰Ken Diosen Jesucristoenere 'urua'da e'kika'ta' ijjeretpaki.

'Urunanada e'manbatia'pakika'ta' huakka' ijpak. Okbirahue'dik ijjeapoy. Okbirahue'da Jesucristoen huadak hua'a e'manbatia'pakika'ta' ijjeretpaki. Oy konigiti nogok nogok aratbut do'taj bo'tiahuaypo mo'peepo Jesucristo 'urua'nanada o'e on'nopoeapo. Do e'noe'pi' e'bueypi' Cristo 'urunanada o'e on'nopoeapo. Kenda ijpak huakka'.

²¹Cristo 'urunanada o'e aya'ada kanoknopoe'po Cristo me'nopo'toenok kenyo'da Cristoenyo'da ijikay. Kenpa'ti ijbuaydepo do'tehuapa' huadakda o'e kurudyo Diosere durugnanada ijika'apoy. ²²Do e'noenayo Jesucristoen huadak hua'a ijmanmadikadhua'apoy huakka'ada on'nopo'korea'po, huakka' nogiti nogiti daka' on'nigpeika'apo. E'bueypi' e'noepi' katea'ta' ijpak no'poe'hue' ijjeay.

²³¿Kate ijka'apet? E'bueyta' ijpakpo Cristoere e'ika'ta' ijpakpo durugnanada ijjunhuahuika'apoy. ²⁴Opudtehuapa' a'manmadikikaya'po noedik ijjeapoy.

²⁵Bueyhue' ijjeapo ijnoeika'apoy daka' ijnopoey. Opudomey nogiti nogiti kanoknopoe'po durugda ka'ne'po a'tihuapokya'po ijnoeapoy. ²⁶Ken onte'ti opudere ijika'aponok Jesucristotaj moknopoeapo durugnanada mo'ika'apone.

^{27,28}Kenyo'da Jesucristoenyo'da huadak hua'a 'urua'nanada yag'kikati'. Opudte ijhua'apetpi' huahue'pi' ijjeapet opudomeya aya'da onpayo' Jesucristotaj daka' o'noknopoe e'tipeeta'

ijpaki. Onpapayo' Jesucristoen huadak hua'a on'batia'pakika'po oknopohue' huahuadiayeritaj mididhue'ada on'batia'pakika' e'tipeeta' ijpaki. Me'pukhue' mo'epo huadaknada bo'kika'nok oknopohue'ada huadiayeria "kenpa'da o'mabueyapoy," nopoe'dik ya'neapet. Kenpa'ti opudomey huaknopoe'eri Jesucristoere durugda o'noeonhuahuika'apoy nopoe'a'dik mo'eapone Diosa. ²⁹Diosa o'paknok Cristotaj moknopopepo kenpa'ti Cristotehuapa' pai'da nopo'e'dik mo'ene. ³⁰Jesucristotaj ijmanbatia'pakika'nok do'taj dig'a'da menogkika'ne. Konigti opudomeytaj dig'a' mogkika'ne. Do'taj dig'a'da menogka'uyne opud'a on'tiahuay'uyne kenpa'ti oydakon dig'a'da menogka'ne on'tipeene.

Diosere Cristo dakteyda 'urunanada Huairi e'cada indariyo o'si'poepo oro'tehuapa' cruzte o'manigbuey'uy. Oy onte'ti Diosere dakteyda 'uru Huairitone' o'ika'.

2 ^{1,2}Cristoa mo'nopo'yarea'po mo'nopo'durugpaka'po kenpa'ti Cristoen nokirega mo'nopo'toenok konigepo huayahuaya di' e'mae'nayo e'matinepahui'nayo opudomey aya'ada konigti yan'nopopepo konigti huayahuaya di' yan'maika'po kenpa'da Dioseno'da e'nigpeika'ta' yan'pakpo ken konig bo'kika'nok do'taj durugnanada o'nika'apone. ³Hua'enda e'pakada sigpi' kahue' yanika'. "Huadakda o'ne." Aratbuta mo'tinopoe' nopohue' yanika'. Donayo dakteyda ehue' ijje'y huata'da yan'tinopopepo yan'kika'. Nogomey hudaknada o'ne, donayo sue'da huadak ijje'y, yan'nopoika'. ⁴Kenpa'da hua'enda pakhue' yanika'po nogomeyen e'huae'taj yan'pakika'. ⁵Kenpa'da dakteyda huairi ijje'y Cristo Jesús nopohue' o'uyng konigti

opudada yan'nopoika'. ⁶Cristo Jesús ke'na Dios o'ika'uyate. Dios e'cada kenpa'da Dios Huairida e'ika'ta' pakhue' o'uyate. ⁷Ke'na 'Uru Huairi ee' Diosyo o'ea'uy konig huabokerek huanaba'nig o'si'poe'uyate. ⁸Huabokerek o'edepopi' nogiti huairi ehue'da o'unhuay'uy. Apag Diostaj o'nigpeepo o'buey'uyate. Konig dakhuea' huaka'erionig hueypa cruzte o'buey'uyate. ⁹⁻¹¹Konigepo Diosa o'noyhuada'po o'tobehuikuyate. Jesústaj o'tobehuikuyate kurudyo. Dios Huairi huadik 'uru'diknada o'dikka'uyate Diosa. Aya'ada Jesústaj nigpe'e'dik o'nika'apo. "Jesús Diosen huakhuairi o'e. 'Urunanada o'ika'." Kenpa'da Apag Dios 'urunanada o'ika'." Kenpa' aya'ada kurudyo huae'eria, aya'ada huadariyo huae'eria, aya'ada kubarakyo huae'eria huikudate on'tibahuadpo o'nona'apo. Apag Dios 'urunanada o'e. Aya'ada on'nopopepo.

Cristotaj huanigpeika'eri konig huakjey 'urunanada o'nika'nok nogomey on'tiahuaypo onpeepo oknopoe'dik ya'neapet.

^{12,13}Diosa mo'manopo'toenok Diosen e'ka'ta' bo'eretpakpo kenpa'ti Diosen e'ka' bo'tihuapokika'nok Diosta' yan'me'puke'ika'po oknopohue'ada konig kurudyo huahua'eri 'urunopo'da Diosen huadaka'da yag'kikati'. Opudere do ee'te do'taj on'nigpeika'uyne, oy huey'yoda ee'pi' nogiti nogiti men'nigpeika', huadi'da egomey, huadi'da pogomey.

¹⁴Maboyhue'ada ayada Diostaj daka' yag'kika'. ^{15,16}Nogiti nogiti 'urua'da Diosen bo'kika'nok nog aratbuta dakhuea' huaahue'dik mo'ene. Diosensi'po 'urua'da mo'noika'po nog aratbutere da huaa'eriere dakhuea' huaka'eriere mo'noika'po huadak hua'a e'noeanhuahuika' hua'a mo'manbatia'pakika'po konig

'urunanada huakjey bo'eypakika'. Jesucristo castiga a'magkaya'po e'tiakde'te opudomeytaj durugda ijjeapoy. Opudtaj nama'da manbatia'pakonhuahuahue' ijikamey ijnopoēapoy. ¹⁷Diostaj daka' yan'durugpakpo huadak moknopoika'po mo'nigpeika'po huakka' bo'yokika'po opudtehuapa' dokon Diostaj bueydik ee'pi' opudere durugda ijje. ¹⁸Opud daka' kanoknopoike'po do bueydik ee'pi' doere mon'durugpak.

Timoteo Epafroditoeretaj o'batia'pak.

¹⁹Jesús Huairia e'paknayo opudomeyte Timoteotaj idada ijta'mona'apoy, bo'tahuade'po ijta'mona'apoy. Onte'ti e'tiakde'te opudtaj kenda ijtipee'depo e'durugpakta' ijpak. ²⁰Doere Timoteoereyo'da opudomeytaj huakka' o'pakpo o'me'puke'po nogomeynayo konigti ehue' o'ne. ²¹Nogomey hua'enda on'pakpo Jesucristoen pakhue' o'nepo kahue' o'ne. ²²Timoteonayo doere 'urua'nada Jesucristoen huadak hua'a o'manmadikika'uy mo'nopoēde. Konig huasi'poa huaojtaj o'tihuapokika' konigti be'tihuapokika'po doere huadak hua'a o'manmadikika'uy. ²³Kenda huairia menogka'apone ijnopoēdepo opudte Timoteotaj ijta'mona'apoy. ²⁴Jesús Huairia me'oroka'apone ijnopoēpo opudte doadakon ida ijhua'apoy.

²⁵Kenpa'ti opudte Epafroditotaj ta'mona'dik ijje ijnopoey. A'nen do'taj katihuapoke'po on'nigta'mona'uyne. Doere Jesucristoen huadak hua'a o'manbatia'pakonhuahuauy. Doere Diosen diga'da teyda ee'tada o'kika'uy. ²⁶Opudomeyte e'huata' o'pakpo hua'dik o'e. Iyo dakhue'da o'eme' bo'tipeeme'nok mo'me'pukeme'nok. ²⁷Dapita' ke'poda o'epo huabueydikte

o'eme'. Buttida ijjay. Diosanayo o'tinepahui'po o'yareame'. Do'takon o'tinepahui'nok nogiti pai'da ehue'dik ijje. ²⁸Konigepo oy huakka' e'ta'mona'ta' ijpak. Onte'ti bo'tiahuaydepo opud kan'durugpake'po do kenpa'ti nogiti mepukehue'dik ijjeapoy. ²⁹Dakiti Jesús Huairi yan'nopoēpo konig huama'buy durugteda yadeti' Epafroditotaj. Konig Epafrodito nog huaknopoē'eria huadak egkika'nayo "Huadakda o'nika'," yan'maknopoika'. ³⁰Ke'na Cristoen o'ka'po be'tihuapokpo o'bueyayme'. Opudomeynayo bidteda e'ēok do'taj tihuapokhue'dik ee'tada ke'na iyoda o'epo be'tihuapokikame'ne.

Huereta'da huaknopoē'eri.

3 ¹Nogiti o'nona'ne, egomey pogomey, Jesús Huairitaj moknopoēpo yan'durugpakika'. A'nen o'nonmadikame'ne. Kenda e'batihuapok ijnopoēpo aroghue'ada onte'ti o'nigmadoya'ne. ²Nama'da huamanmadika'eri o'ne. Dakhue'da huaka'eri o'ne. iKeyoj! Peehue' yaneti'. A'nopo'yareaya'po huabokerek si'dakoktegdik mo'ene. Nama'da on'manmadika'ika'. ³Oro'omeynayo huereta'da huaknopoē'eri o'ene. Diosensi'po o'ene o'nopoēpo Diosen Nokirega mo'nopo'toēpo Diostaj durugda o'epo "dakiti Dios" o'tiona'pakika'ne. Do'taj on'si'dakoktegdik huadakda ijje nopoēhue'dik o'ene. ⁴Huadakda ijika'po Diosensi'po ijje nopoēhue'dik ijje. Huadakda ijika'po Diosensi'po ijje huakka'mona nama'da on'nopepi' donayo huadaknanada ijje nopoēhue'dik ijje. ⁵Do e'si'poē' ocho huame'noe e'ede'te men'si'dakoktegyu. Israel aratbut ijsi'poē'uy. Benjamín aratbut ijje. Do'hued huaoj huayere hebreo hua'a hua'aeri o'nuy. Hebreo aratbut ijje. Konig fariseo hua'eri

Moisésen hua'a on'manmadika'ika' dokon konigti yoknop_oika'uy. ⁶Kenpa'ti Moisésen hua'a diga'da ijjeretpakpo Jesucristoen huaknop_oe'eritaj dakhuea'da ijmagkika'uy. Moisésen hua'a aya'da ijkika'uy. Pablo dakhuea' o'ka' be'api' huaahue'dik menika'uyne. ⁷A'nenda ken konig ijkika'uy, huadakda ijkikay ijnop_oepo nama'da ijnop_oika'uyate. Oynayo Jesucristotaj yoknop_oepo kenyo'da huadak o'e ijnop_oey. ⁸Jesucristo do'hued Huairitaj eknop_oe' huadaknana da ee'tada kenda ijje'uy kenpa'ti kenda ijkika'uy do'tehuapa' konig tajpo o'e ijnop_oey. Cristotaj yoknop_oepo kenda ijkika'uy tajponig ijmaen'uy. Do ijkika'uy konig tajpo ee'tada Cristotaj eknop_oe'nayo 'urunanada o'enkendayo'da ijpaki. ⁹Kenpa'ti Jesucristotaj yoknop_oenok ke'nen ijje'podi Diostaj huadakda ijje'y. Moisésenba' ijnigpeika'nok "Huadakda o'e," Diosa do'taj onahue' ee'tada Jesucristotaj eknop_oataj "Huadakda o'e," Diosa mena'po Jesucristo Diosensi'potaj huaknop_oe'eritaj "Huadakda o'ne," Diosa oa'ika'. ¹⁰Kentayo'da Cristotaj eknop_oe'ta' ijjeretpakikay. Konig Dios teyda o'epo Jesucristotaj e'bueytada o'noyhuada'uyate konigti teyda o'epo huanigpeika' do'takon be'tihuapokike'po kenpa'ti huadaky o'e'kika' do'takon teyda be'tihuapokike'. Konig Cristo Diostaj o'nigpeika'po pai'da o'nopo'epo o'bueypo o'noyhuaduyate. Konig Jesús do'huakon Diostaj e'nigpeika'te pai'da ijnop_oepo ijbueyapoy. ¹¹Cristoen huaknop_oe'eri huabueyere ijnoyhuadapoy ijnop_oikay.

**Nogiti nogiti Diostaj
a'durugpakaya'po katepi'
oro' o'ka'ne nogiti nogiti
daka' mon'nigpeika'.**

¹²Kenda ee'ta' ijpaki kenpa'ti kenda e'ka'ta' ijpaki kahued ijje'y. Kenpa'ti 'urunanada e'huae' Diosa o'pakika'nig

donayo ehuedda ijje'y. Jesucristo me'nopo'toenok konig 'urunanada konig Diosa o'pakika'nig huakka' ee'ta' ijpaki kenpa'ti e'kika'ta' ijpaki. ¹³Kenyo'da 'urunanada konig Dios o'pakika'nig ehuedda ijje'y ijnop_oepo kenda ijkadhuahuika'uy kenpa'da yokkahuuddey. Cristoenyoda e'kika'ta' ijjeretpaki. ¹⁴Apag Dios kenda o'pakika'nig kenyo'da huakka' e'kika'ta' ijpaki. Jesucristotaj yoknop_oepo ijnigpeika'po Diosa huadak be'toene kenpa'ti Cristo Dioste be'tohua'apone. ¹⁵Opudpi' aya'da daka' Jesucristotaj moknopounhuahua'depo konig do ijkikame'nig yokkahuuddey Cristoenyoda ijpakpo ijkikay ken konig yan'pakpo yag'kikati'. Nogded e'nop_oe'nayo kanop_oe'po Diosa mo'nop_oea'apone. ¹⁶Ken konigda moknop_oedepo dakhuapa yag'kadhuahuikati'.

¹⁷Do'taj mentiahuayika'po konig daka' ijkikay kenpa'ti konigti yag'kikati'. Kenpa'ti nogomey oro'taj on'tiahuaypo huadakda ogkika'. Kenomeytakon yan'batiahuaypo konigti yag'kikati', ogomey pogomey. ¹⁸Huakka'mona Cristoen huaknop_oe'eri ijje'y ea'ada huadakda kikhue' o'ne. Konig Cristo cruzte mo'nigbuey'uyate oknop_oehue' huae'eri ogkika' kenomeyakon konigti ogkika'. Kenda a'nenda kirigayo' o'nona'ikame'ne. Onte'ti suhue'nada ijje'podi o'nona'ne. ¹⁹Kene'huaya' huame'noete Diosa castiga o'magka'apo, ehue'da o'neapo. Diostaj pakhue' o'nepo kenpa'da aypo huamai'huepi' o'deretpakika'. Nama'da ogkika'po huadakda ijkay e'nop_oada bira'dik o'ne. Kenpa'ti katetapi' on'tiahuayika'nig on'eretpakika'. ²⁰Oro'omeynayo kurudy_o huae'eri o'ene. Oro'en Jesucristo Huairi, oro'en huamanopo'yarea'eri oro'taj mo'nigtiakaponok o'nigika'ne.

²¹Oro'omeyen pai'da huaso'taj o'maso'to'epo huaboso'a' mogka'apone. Konig Cristoen 'urua'nanada huaso' konigti mogka'apone. Konig Cristo teynanada o'epo aya'tada o'mato'epo, ken konig teyda o'epo huaboso'a' mogka'apone.

Jesús Huairitaj yanoknopo'epo kirigayo' yan'durugpakika'.

4 ¹Konigepo Jesús Huairitaj daka'da yanoknopo'ika'po batikhue'da yanoknopo'ika', huadi'da egomey pogomey. Jesústaj daka' mo'nigpe'ika'nok durugda ijje'po konig do'hued gana huaka'eri mo'ene. Opudomeytaj huakka'da ijpakpo e'tiahuayta' ijpaki, huadi'da egomey pogomey.

²Evodia kenpa'ti Sintique huaknopo'e'eri huaidpo mo'enok yan'nopo'noey'po konigti yan'nopo'ika', ijjay. ³Q'nakon hueretda huaknopo'e'eri huama'buy o'manmadikika'uy, inomey botta' ettone'taj kan'nopo'noey'epo yabatihuapok. Kenomey doere Clementeere nogomeyere huadak hua'a on'manbatia'pakika'uy. Kenomeyen huadik Diosen huanoonhuahuika' beroba'te Diosa o'timadoya'depo Diosere on'noeonhuahuika'apo.

⁴Jesús Huairitaj yanoknopo'epo kirigayo' yan'durugpakika'. Onte'ti ijjay. ⁵Jesús Huairi o'tiakdeaponok opud huadakda o'nepo huayahuaya bahuadiayhue' hua'e'eri o'ne aya'ada kan'nopo'ike'.

⁶Katetapi' mepukehue' ya'nepo Diostaj yan'tiona'pakika'. Menpa' egkapi' yan'tiona'pakpo dakiti yada'ika'. Katepi' bopakpo yan'tiona'pakika'. ⁷Diosa 'urua'nada mo'nopo'noeya'apone. Oro'omeynayo huata'da nopo'noeyahue'dik o'ene. Jesucristotaj moknopo'enok Diosa daka' mo'nopo'noeya'ika'apone.

Katepi' huadakda e'huag'e, katepi' 'uruda e'kika' yan'nopo'ika'.

⁸Kene'huaya' o'nona'ne egomey, pogomey, buttida hua'a, buttida e'nopo'eyo'da yan'nopo'ika'po, huadakda huakika' yan'nopo'ika'po, nogomeytaj butukdikyo' yamaknopo'ika'po, 'uru'nopoyo' e'kika' yan'nopo'ika'po, di' e'maika' yan'nopo'ika'po, katetapi' huadakda o'e on'batia'pakika'nig yan'nopo'ikati'.

⁹Opudomeytaj ijmanmadikadhuahuika'uy daka' on'peonhuahuika'uyne kenda yag'kikati'. Kenpa'ti aya'da ijrika'uyne bo'tiahuayonhuahua'uy, kenda yag'kikati'. Ken konig bo'kika'po Apag Dios huamanopo'noeya'eri opudere mo'ika'apone.

Pablotehuapa' huakupe Diostaj on'yokika'uyate Filipos huaknopo'e'eria.

¹⁰Do'taj onte'ti okkahuehue' o'nika'nok Jesús Huairitaj huakka' ijdurugpaki. Do'taj e'tihuapokta' e'pakada kahue'dik moe'uyne. ¹¹Pai'da ijje'y ahue' ijikay. Konig ijika'po katepi' to'ehue' ee'pi' kenda Diosa o'paknig ijnopo'epo durugda ijikay. ¹²Nogok pai'da ijje'uy. A'nenda huakka' ijto'e'uy. Pai'da ijje'po durugda e'dik ijje'y ijnopo'edey oyda kenpa'ti huakka'da ijto'epo durugda e'dik ijje'y ijnopo'edey oyda. ¹³Jesucristo be'teypaka'nok katepi' Diosa o'pak kenda ka'dik ijje'y. ¹⁴Kenpa' ea'pi' do pai'da e'nopo'ete on'tinepahui'po on'tihuapokuyne. Huadaka'da bo'ka'uyne ijnopo'ey.

¹⁵Opudenbayo huabo'ada Jesucristoen huadak hua'a e'manbatia'pakonhuahua'te Macedonia huadaribaya' e'huade'te opud Filipenses huaknopo'e'eriayo'da huakupe on'yokuyne. Huadak

hua'a mo'pe^{ee}depo durugda mo'epo on'yokuyne. ¹⁶Kenpa'ti Tesalónica huakka' jakyo ee'te huahued ee'te do'taj a'tihuapokya'po nogok nogok huakupe on'nigta'monika'uyne. ¹⁷Huakupe do'tehuapa' Diostaj bo'yokika'nignayo sue'da ijpaki. Do'tehuapa' bo'yokpo Diostaj huakka' mo'durugpaka'nok Diosa 'urunanada mo'nigkadhuahuika'apone. Kenda huakka' ijpaki. ¹⁸Epafrodito opuden huakupe me'nigtotiakme'ne. Dakhuapa kenpa'ti nogitida ijbaedemey. Huakka'da ijtoey. Kenda do'taj on'yokme'ne konig Diostaj e'yok 'uru'hujeonigda durugda o'bae'. ¹⁹Dios Jesucristoere huakka'nanada on'toepo di'nanada mo'epo opudomeytaj daka' tihuapokdik mo'ene. Katetapi' pai'da

ee'nayo Diosa bo'yokapone. ²⁰Apag Dios 'urua'nanada o'unhuahuika', 'Urua'nanada Dios, mon'tiona'pakika'.

**Nogiti kene'huaya'
Pabloa huaknopoe'eritaj
o'madikta'mona'po
o'manigmadoya'uyate.**

²¹Aya' Jesucristoen huabaktie'ea'eritaj yan'madikta'mona'. Ken huama'buy doere o'nepo mo'dikta'mona'ne. ²²Aya'da Jesucristotaj huaknopoe'eria mo'dikta'mona'ne. Roma huairien jakyo huaknopoe'eriakon huakka' on'pakpo mo'dikta'mona'ne. ²³Jesucristo oro'omeyen Huairia opudomeytaj mo'tinepahui'po bo'tihuapokike'. Kenpa' ijtiona'pakikay, do Pablo.